



鳳臺縣志續志



叙

袁太史叙縣志曰志者治
所資治一縣難志一縣亦
不易誠哉是言也夫山川
關隘里甲疆域治之所稽
以出者也而胥於志乎徵

之田賦戶口人文物產治
之所酌以行者也而胥於
志乎辨之昔人謂縣以知
名必一縣之事無不悉知
而後可稱知縣事不志無
以知不知無以治鳳臺之

志其有裨於鳳臺之治者
非淺鮮矣續志之修烏容
緩乎顧續志之在今日則
有難焉者鳳臺舊爲澤州
雍正間始立縣縣無志乾
隆中知縣林荔本州志而

增輯之而縣之志以成迄
於今幾閱百年矣數典多
忘舊聞莫溯鄉賢銘表或
同薦福之碑名宦甘棠難
考峴山之石而且太冲之
賦覆瓿而亡長爪之詩焚

囊以絕既不忍遂聽其湮

沒又不可徒托諸空談雖

善無徵無徵不信閣筆者

所以費評章也然而大祲

初過一二遺老猶有存者

雖難盡信乎耳聞尙可相

傳於口授及此不修則遺
失更甚不且並今日之不
忘者而忘之乎壬午春初
余承乏茲土前任張瑤卿
首以志局囑因延諸紳問
所以修輯之要而又備閱

舊志詳考異同竊嘆搜羅
敘述舊志已賅依樣葫蘆
矩矱斯在迹而踐之卽今
日之所以續者也但志中
門類有百年不變者有數
年輒變者其百年不變者

雖屢續而毋庸贅其數年
輒變者乃今日治之所當
急正今日志之所當急矣
昔也阡陌連雲今也荒蕪
徧野則田賦變昔也雞鳴
狗吠四境相聞今也室宇

多空村莊或廢則戶口變
昔也萬金之家遍於各里
夙稱巨富者十餘戶今也
殷實之民四鄉絕少其一
二舊家資產僅留夫末賸
則富室變昔也進士常四

五人孝廉常十餘人科歲
童試常八九百人今也四
十餘年無甲科矣孝廉六
七人童試一二百人而已
則人文變昔也鐵冶遍於
西南歲入白金數十萬今

也寥寥數十家所入之金
十減七八則物產商賈變
夫知其所變當思其所以
變舉所變而振興之而使
之善變以復其初生息教
訓伊誰之責歟光緒庚辰

歲 上憲以纂輯通志令
各州縣續修邑乘以備採
擇余下車之始局設數月
矣修採章程張明府約有
成式余踵事增美樂觀厥
成其修輯採訪諸紳之力

爲多而鉾梓之費則邑中
富紳咸願輸貲以竣其事
孟秋書成用付剞劂焉竊
維製錦才疎操觚學淺治
鳳臺者旣愧涓埃之莫補
志鳳臺者又慚鞶線之無

長惟是率由舊章博稽輿
論凡昔之同於今者不必
增而今之異於昔者不敢
諱雖徵文考獻歲久難免
無遺而揭榜通衢去取實
與眾共祇以自盡其愚拙

深知遺笑於大方綴言簡
端略敘梗概後之君子之
覽斯志也於山川關隘疆
域里甲之不變者既可遵
古以酌今於田賦戶口人
文物產之輒變者惻然念